

Air pasang besar kembali ancam penduduk Kota Bharu

KOTA BHARU 9 Feb. - Fenomena air pasang besar serta angin kencang luar biasa kembali melanda negeri ini menyebabkan penduduk di kawasan pesisir pantai mula resah.

Antara kawasan yang teruk terjejas adalah Kampung Pantai Pulau Kundur, Kampung Pantai Mek Mas dan Kampung Pantai Tujuh Kemanan.

Di Kampung Pantai Pulau Kundur di sini, ombak besar menenggelamkan rumah penduduk sejak semalam menyebabkan 17 keluarga terdiri daripada 85 mangsa dipindahkan ke Sekolah Kebangsaan (SK) Pulau Kundur.

Kawasan perkampungan nelayan itu ditenggelami air sehingga paras pinggang, namun dilaporkan surut kembali pagi semalam.

Tinjauan *Utusan Malaysia* di kampung tersebut mendapati, cuaca yang masih tidak menentu seperti angin kencang dan hujan lebat sejak dua hari lalu menyebabkan penduduk takut untuk tinggal di rumah masing-masing.

Bencana tersebut menyebabkan sekurang-kurangnya sembilan rumah di kawasan itu rosak teruk manakala belasan lagi ditenggelami pasir setebal sehingga satu meter yang dibawa oleh ombak besar.

Seorang penduduk, **Asiah Yacob**, 42, berkata, fenomena kali ini lebih menakutkan berbanding kejadian sama bulan lalu.

"Saya tinggal di rumah bersama suami dan dan tujuh orang anak. Ketika kejadian kira-kira pukul 8



SEBAHAGIAN daripada rumah penduduk musnah akibat air pasang besar di Pulau Kundur, Kota Bharu, Kelantan. - UTUSAN/FAKHRI LUDIN

malam, kami sekeluarga terkejut mendengar ombak menghempas dinding rumah dengan kuat.

"Bagi mengelak kejadian tidak diingini, kami segera berlari keluar sambil membawa barang berharga serta dokumen penting," katanya.

Menteri Besar, Datuk Ahmad Yakob yang meninjau lokasi keja-

dian berkata, pembinaan benteng penghalang hakisan di kawasan itu memang sudah dimasukkan ke dalam Rancangan Malaysia Ke-11 (RMK-11).

"Jadi kita berharap pembinaannya dapat dilaksanakan secepat mungkin bagi memastikan keselamatan penduduk dan harta benda mereka terjamin," katanya.



SEKUMPULAN penduduk membaiki rumah mereka yang rosak akibat ombak besar di Pantai Kundur, Kota Bharu, Kelantan, semalam. - UTUSAN/ROSNI MASRI